

魏叔子文集外篇

羅叔子文集外篇策目

第三卷

救荒策

制科上

制科中

制科下

變法上

變法下

封建一

封建二

封建三

魏叔子文集外篇卷之三

策

寧都魏禧冰叔著 諸子世傑典士編次

救荒策

天災莫過於荒。天災之可以人事救之，亦莫過於荒。古之行荒政，言荒策者，不一有永利者，有利用一時，不可再用者，有可行者，有言之足聽行之，不必效者。要或散見諸記籍中，未有統要。余據所見聞，擇其可常行無弊者，條之救荒之策。先事爲上，當事次之，事

後爲下先事者米價未貴百姓未饑吾有策以經之
四境安飽而吾無救荒之名所謂美利不言是也當
事者米貴而未盡民饑而未死有策以濟而民無所
重困所謂急則治標是也事後者米已乏竭民多殍
死遷就支吾少有所全活所謂害莫若輕是也凡先
事之策八當事之策二十有八事後之策三

先事之策一曰重農

農者粟之本或興屯田或脩水利或賑貸牛種或
親行田野勸相或分督里役地方請舉游惰或開

墾荒之法而首在不以工役妨農時不以獄訟擾農家如此則農事舉矣

曰立義倉

貧民富民多不相得富者欺貧貧者忌富貧民閒時已欲見事風生一迫饑饉則勢必爲亂初然搶米再之劫富再之公然嘯聚爲賊富民目前受貧民之害貧民日後受官府之刑兵刀之慘真貧富兩不得益也所以朱子脩舉社倉特救一時餓殍實所以保富全貧護人身家養人廉耻爲法至善

今師其意而少損益之凡每坊設立義倉不必分
派若干家若干人隨其相附近處擇便爲之聽民
自議自行則衆情和矣但建倉費重或勸富民或
設處公費隨時斟酌此在官長以真心勤力行之
凡欲立義倉先集父老士民懇切開諭以義倉之
利身先捐俸以勸富室然後出示遠近令十日內
報命凡報命者合坊具連名呈一紙內稱遵諭設
立義倉共計戶丁若干出谷者若干舉值事者一
正二副某人造冊二本一丁冊一義谷出入冊凡

丁冊不論男婦貧富貴賤皆載之呈及二冊官皆用印旋給本坊收掌其官所助谷若干照各坊丁數多少派貯倉內舊冊寫完則仍以新造之冊送官用印坊中有富豪慳吝不肯助義者許本坊呈官視所應出者加罰二等所舉值事之人有不法不公者本坊呈官重罰公舉他人代之或本人有病故久出者仍簽他人代之俱要呈官其呈仍用印付還或坊中事繁三人不能理許值事人隨簽幾人幫之本坊俱要酌處公費以酬其勞至義谷

出入之數官府不預只於當發糶之時先期出示
令各坊清覈丁數定於某日糶米官府時行巡訪
於當收糶之時先期出示以某日起糶谷至某日
報完踰期不完者以欠穀多少議罰凡坊內與糶
者設簽一根寫戶首姓名下注共計幾口糶米時
左設一人散簽右設二三人量米來糶者先將名
下應糶米錢若干交左人領簽即將簽投右人照
簽領米散米已完右人繳簽交左人收明日如之
富室及僮婢皆許與糶凡糶米如原價每升一分

今價三分則取分六釐二分則取分四釐分半則
取分二釐分二釐則取一分升一分則不出陳矣
蓋酌取餘息以供耗折及脩倉雜用諸費也凡石
斛升斗之類皆一聽官造日久器壞許如法私造
仍送官驗押蓋以賞罰之權歸於官則人知所畏
以出入之數歸於民則官無可私所謂官民相制
其法無弊者也○造倉之法如係五間只以四間
貯谷空閒一間以便搬移倉谷防整倉及新谷發
熟等事法詳前議可按而行之

湯念平先生勸積義穀序曰民窮日甚借貸無門
一有災荒坐而待斃昔朱文公社倉一法最爲盡
善然時詘舉贏實爲難事宜師其意而力行之爲
積義穀法每坊造一木櫃置本坊神廟每月朔望
謁廟者各持義谷少許或一角或半斛或一升至
小斗而止勿得過多不願助者聽隨其意而因其
力不相強也數少而不欲多者相形則意沮力輕
則可久也其推一端謹者司登記雖一角半升必
紀其名以彰好義推一稍有恒產而素行忠信者

司出入每朔望迄晚卽將貯櫃者登倉次年春夏
推陳出新因數多寡貸與農人息取加二小荒則
以貸諸貧人而減其息必公議而酌行之若大荒
則盡損以賑困窮必計衆而均分之先其老弱之
無告及孝子節婦之貧者是舉也專以脩荒而利
農他雖公事急需不得輕移以致耗散有恃強而
索者衆共持之不聽則控諸官庶幾可久行而不
廢夫爲數甚少則人皆樂助月月積之歲歲行之
斯可無大饑之患矣噫省目前宴飲之費卽可甦

異日數人之命減一月鷄鵝之粟即可救他年同類之生獨何憚而不爲哉○又募義穀疏云里中親友壽誕稱觴當計其費出義谷欲爲人稱觴者亦計其費出之或宴會有不可已者則薄其費而以義谷補之夫省酒食之浮費以利濟饑貧此祝壽之上術也又有疾病及一切祈求亦於神廟發願出義谷若干夫省齋醮之虛文以利濟饑貧此祈神之上術也蓋天地鬼神原以愛人爲心能愛人者則彼亦愛之以此祝壽壽必永以此祈福病

必愈以此祈名利子息名利子息必得矣○按二條法最簡妙能濟義倉之窮故備記之

黃存齊曰畜馬乘不察於雞豚士大夫而積穀高價以病小民可乎朝廷當爲禁律凡已出仕田滿五百石者穀貴出糶止許依秋成原價每担酌取倉耗三分於已無損於人有益若乘風高價者治如違例放債之罪○按此意只可勸諭鄉紳富民聽其自行賢士大夫身爲之倡未可以法繩人也一日設砦堡

義倉之法。仍當勸諭鄉落行之。或一鄉自建一所。或數鄉共建一所。其事槩聽之鄉人。而官府第班式勸成而已。但鄉落中無城郭足恃。或有兵寇騷擾。則義穀蕩耗斷難復聚。當令各鄉於附近之山。有險足恃者。因以爲砦。無砦者爲堡。而置義倉其中。有急則并婦女牲畜衣服器用徙居之。蓋砦堡之設。可以固生聚。可以保義倉。可以行青野之法。以困敵。所謂一舉而三善備者也。○彭躬庵日設砦堡。最利鄉落。更可以保護城邑。而險不爲賊據。

此從來救荒策中所無

一日酌遠糴之禁

本地產穀有足支數年者以遠方糴運過多遂致產穀之地頓成餓殍然槩禁遠糴則一方粟死一方金死交困之道也當於收成時出示諭民凡收穀者自計兩年口食以外每穀十石糴五石支用存五石備荒又爲酌視時價貴賤以爲啟閉如僅滿地方常價聽其搬糴過常價三分之一外則不得糴遠違者籍谷入官分給義倉至新穀收成已

完則舊穀任糶矣

一曰嚴游民之禁

百姓不謀生業者宜置常罰令鄉耆鄰里時簡舉之蓋游手好閒之人如米中蠹虫飢饉之時死亡猶甚多至爲盜賊者若督令務生則自可生財有養身之具矣然欲耆里簡舉而不實心行鄉約保甲之法未易辨也

一曰制穀贖罪

凡有罪犯情理可原者一炤買穀備賑銀數輸穀

不令輸銀其穀分寄各坊義倉值事者具領狀交
官俟賑糶時如數取出以施最窮苦無告之人或
米或粥視米多少可也蓋義倉雖以周貧然須有
糶米本錢則鰥寡孤獨一文不辦者盡餓死矣但
施米仍當責成各坊值事每日清早糶米飯後施
米仍效義倉領簽例令各來報名每人寫一票給
之爲據領票領米一如義倉但不須交錢耳蓋事
歸一人則坊人姓名已熟虛實盡知自不至於混
領若以事歸官府另簽胥役行之爲弊不可勝言

一日豫糴

凡地方遇有水旱便當實稽境內人丁核境內穀
粟扣算缺少若干卽多方那處遣富商豫往谷多
處買之蓋有水旱則必有饑荒若臨饑方議他糴
便難措手且米價亦必踊貴也

一日教別種

地方遇有水旱種植必不得時卽須先察地利如
水多害禾則急以不忌水者種之旱久害禾則急
以不畏旱者種之失彼得此尚可支持其半大抵

以先時急做爲勝著也

當事之策一日留請上供之米

地方大饑或有本地應解糧米及他處經過米般不妨權留賑濟然後申報秋熟卽行糴償在朝廷不過緩數月之糧在百姓卽活數十萬人之命雖以專制買罪又何傷哉

一日借庫銀轉糴

地方大饑欲他買又苦無銀不妨那借庫中錢糧糴賑從容設處以償擇平日衆推誠實能幹百姓

任其事或仍勸富民自販開以薄利使之樂趨

一曰權折納之宜

時當凶災擇荒熟相應處以荒處折納之價於熟處和糴則荒處不至太貴熟處不至太賤兩利之道也○凡爲守令權不自主者則申請上司行之他准此

一曰捐俸勸賑

地方大饑有司當以至誠開諭勸富民賑濟或減價出糴或竟行施予然本官須先捐俸倡義庶幾

不令而行

一日重賑穀之勸

饑饉時有能大出粟以賑者或聞於朝廷加以官號或請於上司給其官帶扁額以示酬勸

一日興作利民之務

地方大饑窮民多無生業此時或修橋路或濬水利種種必不可已之務當槩爲脩理蓋窮民借力作以資生而我又因以興利一舉兩得之道也

一日勸富室興土木舉庶禮

地方大饑宜勸富室營造土木及一切當行之禮
使貧民得以資生蓋損富而富實未損益貧而貧
不虛益勸諭時當以三利歆動之一則成吾欲爲
之事一則借此賑貧有大陰德一則貧民樂業不
至爲盜富室所益更多矣

一日均糶

米數旣貴富者得以多糶則貧者益少每日市糶
當依每家丁口爲準人口少者不得多糶則米穀
均矣

一日嚴閉糴之法

富民擁有多粟除本家口食外餘至百石以上閉糴專利者許人告發官府盡籍穀賑貧告虛者反坐蓋彼所利在多得米價今併米本失之其閉糴者鮮矣○溫伯芳曰吾邑荒少而穀常踊貴弊不在富戶而在鋪戶鋪戶閉糴而後價忽高鋪戶得高價富戶之價愈高總之寧民家無杵臼皆糴於市鋪戶遂操其重昔葉令公

名向榮金華人

處之極善每

早巡行各街米戶不出糴者杖數十於是鋪戶欲

高其價不得而富戶知市價如常各競出糶矣蓋
公稔知此時非有水旱兵凶之災客歲之人如常
何以來歲之供不足不過兩暘偶愆何至舊穀頓
盡至於閉市乎○按此須實知境內穀多乃可行
不可執爲定法

一曰重強糶之刑

時方大饑民易生亂若縱其強糶則有穀者愈不
肯糶四方客粟聞風不來立饑死矣且強糶不禁
勢必搶奪搶奪勢必擄殺當著爲令曰有不依時

價強糴一升者卽行梟首。蓋彼原欲少取便宜。今并身命而亡之。其強糴者鮮矣。○或謂閉糴自百石以上強糴自一升以上閉糴者止於籍穀而強糴者遂至殺身輕重不太懸乎。曰閉糴之人雖不仁猶不過專自有之利。強糴則是妄取他人罪自不同。況閉糴者少強糴者多乎。○彭躬庵曰此法須不動聲色使百姓曉然知殺一人乃可以生衆人始不激變。

一日不降米穀之價

米方大貴有司樂於市恩動輒降減米價以博小民一時歡心不知米價減則富戶不樂糶而四方客米亦不來矣惟當聽民間自消自長粟貴金賤人爭趨金米價不降自減也○或謂古人有遇饑輒增米價而米賤者其法可行乎曰此非一定可行之法也萬一我增米價而客米一時不來彼貧民能當許久重價乎大抵地方富饒所欠止在於食則不妨增價以招客粟若地多貧民此法恐不可行止一不降米價尚爲穩著

一日覈戶口

時當饑荒須先詳覈戶口若干扣算賑糴之穀若干賑濟之穀若干每丁應得若干先有定局則無不均之患而設處之方可早謀矣

一日無失期

不論賑糴賑施俱當先期四處張示的於某時舉行不可遲悞失期有辜人心且虛勞小民奔走

一日定鄉城分給之法

凡賑糴賑施每日一給則太煩而小民易荒生業

至鄉落尤難行矣。當先定爲今日凡城市每給五日，鄉落三十里內者每給十日，三十里外者每給半月，或謂鄉落路遠，當每給兩月，日每給兩月爲數太多，小民不知遠計，多穀在手，便不樽節，甚至以易酒肉者有之。到甕盡杯乾時，不束手待斃，又邪思生亂矣。○或謂貧民無資，必待每日生理，方可得糴此條，只可行於賑施，不可行於賑糴，當酌其無弊可也。

一日多置給米之地

給米須多設處所派定某關某處給某關某處給則不至捱擠失序

一日編戶丁牌

領米最易爭擠多至混數若做義倉領發又人多難行當照戶編牌如考試例循次領給則諸弊俱無矣其牌每戶止寫丁首一人

一日慎擇給米之人

主管給米最要得人須平日實訪其人公平廉能者方可屬事每處擇一善耆主之又聽其各擇一

三人爲副必不可令衙役與事也

一日不時巡訪

任縱得人未必一一皆當有司於給米時當不時出訪或東或西或詳或畧或隨手取米以驗美惡或隨喚領米人驗剋減與否至於出訪或輕車或緩步不可盛列騶從使人得爲備

一日別賞罰

不時巡訪則任事者之賢否見而賞罰可行矣有公平廉能者則重賞之或優以冠帶或旌以財帛

隨其功之大小可也有奸貪私剋者則重罰之或加刑或罰穀隨其罪之輕重可也至於無他罪犯止是才力不濟不能處分條理者則無賞無罰下次不復簽用而已

一日暫省衙門役期

時方大饑衙役工食多不足贍此時當減其半役使之營生如舊例一月供役十日今止取五日

一日清獄

饑饉時平民已難治生獄囚死者八九矣清獄宜

分三等輕者竟釋之次者限親隣保結俟穀熟時再拘大罪重犯囚而少服之

一日禁訟

大荒之時治生不暇況治訟乎凡除人命賊情搶擄外一切財產婚姻等訟槩不准告已告者槩停不行

一日弛稅禁

山澤市貨等利法有禁者此時宜暫弛稅弛禁廣其營生之路至穀熟時復舊

一日脩街道

街道污穢易生疾病荒疫相因尤不可不慎故當脩潔街道以防其漸

一日收棄子

饑民有棄置子女道路者許人收養凡收養者具呈至官云某年某月某日於某處收得子女幾人歸家撫養官爲用印給之太平長大一聽收主照管本生父母不得爭執其收主願贖者聽或能收養自幾人以上者官府爲立賞格勸之

一曰贖重罪

重罪無贖之理。然能多出穀救荒。則雖枉法以生一人。而實救數千百人之死。亦權道也。○重罪如泛常人命事。則許贖。若劫殺真賊。及人倫大變之犯。則不可贖。更舊冬以前人命。可贖。本年所犯。則不可贖。恐富人乘機報復故也。

一曰收買民間草薪衣服器用

饑荒之時。貧民多賣衣服器用以給食。而富民乘人之急。甚至損價十之九者。此時官府宜那移錢

糧設人收買使貧民不至大虧則謀生之路寬矣
秋冬間仍行發賣便可補數至於草薪之類亦當
於此時收買俟寒雨賣之仍可得利此古人已行
之効

一日多置空所以處流民而嚴其法

大荒之時有他郡流民走徙就食者若處之不得
其道則流民立死且或生亂有司當擇寺觀公廨
一切空所分別安插每處設一人管其事立法以
繩之諸如臥所有定出入有時領米有叙若亂法

者初犯三日不給糧再犯逐出境外其有休養壯健者則令執工役之事或僱募民間便不許坐食矣。

事後之策一日施粥

饑荒已極不能賑米當設法施粥施粥須因里設廠若勞其遠行恐半途什斃又須立人監理令饑民至者隨其先後來一人則坐一人後至者坐先至之下已坐者不許再起一行坐盡又坐一行以面相對以背相倚空其中路可令擔粥人行行走坐

至正午擊梆一通高唱給第一次食令人次序輪散有速食先畢者不得混與一次散訖然後擊梆二通高唱給第二次食如前法共三次卽止蓋久饑之人腸胃枯細驟飽卽死惟饑民中稱有父母妻子臥病在家者量行給與攜歸處分已訖方令散去散去之法令後至坐外者先行挨次出廠庶不擁擠踐踏又多人羣聚易於穢染生病須多置蒼朮醋碗薰燒以逐瘟氣又不時察驗嚴禁官粥者剋米將生水攪稀食者暴死其碗箸各令饑民

自備○按米多亦不得施飯久饑食飯有立死者
一日施藥

賑粥或不能多服藥亦可免死當多合救饑丸以
周給之亦不得已之極思也諸經驗奇方另載

一日塋殍

餓殍載途穢戾之氣易生病疾當隨時收塋或爲
大坑叢埋亦補救之一端也

禱按古稱救荒無奇策要凡天下之策未有奇者
因時制事世人不能行而獨行之則謂之奇耳是編

多輯古人成法間以意損益之然一人耳目有盡心思有所不及又或自擬良法行之不能無弊者增美去惡以成萬世萬民之利是在後之君子矣

朱方來曰周禮荒政十二有不切於事者後世因時制宜妙用無方然散在他書難於取法勺庭先生山居二十年心計手畫無時不胞與天下所著策畧多萬世大計予獲與其門下士游嘗竊窺一二而此策斟酌今古流自苦心尤爲荒政中集大成也或謂如留請

上供借庫銀轉糴今亦決不可行余謂此固
在人所自命耳曹王臯專制貸廩寧殺我以
活衆而唐宗優詔答之李元忠違詔大賑束
身待命而齊主亦不罪何代無賢安見三古
而下必臣不汲黯而君不漢武哉篇中立一
法卽有一救弊之法周詳精當中有似瑣而
實密似偏而實確似迂而實切者讀者尤當
用心天下司民牧者果能行此則天不能災
民生遂而國本固矣

○制科策上

古者取士之途

制科不之盡而十之法以爲制科廣國家則專出于制科而其法尤未

善八股之法○法言之耳一在于摹聖人之言不敢稱引三代以

下事不敢出本題以下之文一在于排比有定式夫

題之義理有博衍數十端然後足以盡者有舉其一

端扼要而無遺者今必勒爲排比則是多端者不可

盡而得其一說而畢者必將彊爲一說以對之其對

之又必摹其出比之語斤斤然櫛句比字而不敢或

亂六朝之文排儷爲工雖雜施于游豚箋記而後人

尚譏其陋。今之以長對排儷而譯經傳其陋抑可知。已。聖賢之理適用爲本。故言理不徵事。則迂疎。古人之言不徵後世之得失。則言之富且精者不得見。今必以爲不可毫髮有所損益。則是古人所一言者。吾從而再言。所短言者。吾從而長言。言之毫髮逮聖人無益。況必不逮耶。朝黜雜學。尊孔子。勒四書五經爲題目法。視前代爲獨正。販夫監子莫不知仁義道德之名。然才略迂疎不逮漢唐遠甚。及其後則遂欲求爲東晉南宋而有不可得者。天下奇才異能非。

八股不得進。自童年至老。死惟此之務。于是有身登甲第。年期耄。不識古今傳國之世次。不知當世州郡之名。兵馬財賦之數者。而其才俊者。則于入官之始。而後學。故居今以救制科之敗。愚則以爲莫若廢八股而勒之以論策。故曰八股之爲經濟者。施於論則腐矣。論施于策則迂。策施于奏議則疎。何者。言理者易僞。而覈事者難欺。是故法未久而不敝。然其立法之始。則不可不盡善。論策之制。其敝也。必有勦襲靡衍。夸而不適用。而天下之人。則勢不得不取古今

治亂之書而讀之而講求。天下兵馬財賦關阨險阻。
時務利害之事。今夫采魚者必張網于大澤。獵獸者
必設置于淺山。夫固有不得獸者。顧涉澤以求獸而
越山以問魚。是所謂索燧人以三凌之水。繫驥驥之
足而責千里者也。

兄善伯曰破八股之陋處字字的確公平可以息
天下之辨矣。然猶有謂八股爲盡善者真不可解。

○○○制科策中

聖人之學不明于天下而較事功則刑名功利之說

起求其治必亂吾故曰吾之說非舍四書五經而別

求之四書五經命題以正其本變八股制論策使人

得盡其才適于實用以救其敗請言其法凡童子試

小學論一道科經書白文三四書一易書詩禮所占

某處起默書至某處止兼弟子員試四書一道所占

經一道策一道鄉試策一道春秋一道判一道四書

一道所占經一道會試策二道判六道皆一試凡小

學四書經爲論無定體無長短格及稱引秦漢以下

得失當代時務諸禁凡命題毋割裂章句以巧文虛

縮巧搭格

難題之類毋褻而不經如鑽穴踰牆殺雞攘羊之類

凡判必依律

舉事當不嫌其

去對偶如讞獄之語或設事造題使議其罪

假立一事令議

語之雷

甲乙所犯據律例應得何罪

凡試策試州縣者策以其州縣之利

者更一而試即

害

或問地方現在何事作何區處或泛問利弊

鄉試策以其鄉會試策以

鄉會試亦然

天下之利害會試之策槩論國勢治道或古人當國

事業者一分吏戶禮兵刑工六職命題者一自爲弟

子員使各占其所能

如習吏則書一吏字于卷面同占經例

專才者對

其弊必有以夸
言取清
華及以
美官私
所親以

一科通才者對數問中進士廷試則使雜陳其所見

而考難之以定其官

人有平日議略出有司命題之外者故令雜陳所見面相考難

或天子自試或公卿雜試之參

用虞廷敷奏周官辨論之意于是以通才者署郡

縣選專某職者就某部觀政授某部官既受官以奏

疏疏之體必簡而直簡無繁文直無隱事天子一日

余空振云此可為奏疏法音韻文收單獨

萬幾文繁則目眩驚虛而失要事隱則不足知事之

利害與人之賢否奏某事曰某臣奏為某事若何則

利否則害言者能行則曰臣所見如此臣實堪朝廷

試而用之否則曰臣能言臣不能行以臣所察某臣

難事報
所惡者
全在試
字尤要
嚴欺罔
連坐之
法

能堪臣言朝廷試而用之又否則曰臣所言臣與僚友不能堪朝廷懸其言于朝以待能者

或謂所言事廷臣舉無能者言之何益不知吾所知之人雖皆不能天下或有能人而吾不知卽一時無其人有必不可不存此論者如漢武帝下詔募使絕域雖非當務其法可倣也愚謂國家有大難事竟當另設一科懸格以募異人儲材以備急用事畢卽罷其科不爲定制可耳 乙酉自記

兄善伯曰法度簡要一語一字皆有精思達識真

經國大文章也

弟和公曰吾兄時務諸策如此等文字皆高出陸
宣公蘇文忠之上

諸子世做曰徑叙有頓挫無一繁字

○○制科策下

童子何以試小學天下之亂。繇風俗壞。風俗壞。繇小學廢。是故使之孝親敬長。奉法守禮。童而習之外。柔其筋骨。而內植其心。故孔子曰。少成若天性。習貫成自然。今之人。幼習章句。稍長治文藝。童子能時文。則泰然以謂成人。于是有身登甲第。年壯強不能隨行。後長之禮者。何以不兼試四書。四書之旨。濶而博。兼則麤。專則精。兼則四書重。小學必廢。何以離春秋于四經。董子曰。不學春秋。處經事不知宜。處變事不知

權也是故人君不能辭首惡之名而人臣不能免亂賊之誅故不人習戶曉則匹夫不能治一家何以鄉會試首策也中式者必得官故以練事爲先也鄉試之策何以不分六職守一職者必兼知六職之故故官欲其專學欲其通也會試則今日中式而明日授官爾何以鄉會一試能者一而足不能者十試之以百篇無益專才者何以授部官將使之歿于其職已矣官祿以能遷而職不變終身習其事不去則勢便而智力出唐虞三代未之能易也朝刑暮禮則起臯

契而生之必不能通才之能大郡縣之選卑曰吾將
是以爲宰相古者宰相必歷試州郡使知民情書曰
其在高宗舊勞于外爰暨小人夫天子不可坐而理
而宰相專用翰林國家所以無相業者以此然則治
小學何以不治孝經曰此非聖人之言庸已甚于小
學孝經之美存焉而去其庸漢儒僞作無疑也春秋
合題可乎曰或事反而理同或理同義相表裏于四
書于他經則可擬而行也合傳則不可春秋之文簡
又去其弑逆崩卒爲不祥故不得不取傳割裂而牽

附之以多其目若射覆然勞心殫智而無用且夫武王卜洛曰有德易興無德易亡弑逆崩卒聞之者足以戒焉安在其不祥也雖然于禮于詩于小學則又有說禮出小戴其書多尨雜而叛道不可不釐正也否則不得尊于經鄭衛之詩紫陽以爲淫風者十七八然則聖人何以不刪曰示戒也示戒則宜存新臺鵲奔男女贈答穢褻之詞何以錄考乎古傳得之矣小學精可爲聖人龕之不失常人然而有古禮若內則不適時者有關畧若朋友之義當補次者有義精

溪不可喻童子者則必考定焉勒爲不刊之書

吾變法三策唯制科法雖擾攘之時中才之主無
不可行然其法與學校官制相爲表裏革奄宦則
君必聖賢而後能益非減宮嬪之數定時見羣臣
之制寡欲勤政未易言也限田則與保甲相表裏
及篇中先事數款故曰法必相輔而後行古人制
度有此一事爲盡善而此一事所以盡善處實不
專在此一事也三策作于乙酉五月其後稍損益
之云

癸卯自記

彭躬庵曰洗發重小學是根本之論試春秋是特
識辨別分通才專才是實用其諸附見關係學術
治理精鑒不磨

弟和公曰樸屬勁轉開闔有節似文武解王會諸
篇

○○○變法上

法宜變者乘天下之時而已。吾辭其害收其利而又
適當乎其時也。安於故常而不變則惑矣。故聖人崛起
光復故業。此可大變以與天下更始之時也。其法
有三。一曰論策制科。一曰限田。一曰革奄宦制科限
田。子既論之詳矣。請言革奄宦。夏商以前不聞奄人
之名。至周以罪人供事。秦漢以降悉平民矣。天子作
民父母。民有不遂其生者則必扶養而補救之。傳曰
山不槎蘖澤不伐天殺鳥獸不以時者有禁。仁人之

於物如此其不忍也。今舉天地所生之人，使絕其生，
生不息之理，身瀕於死而幾幸以服吾事，何其不仁
之甚也。古之聖王，日置仁人于側，下至鵜僕藝人，必
極庶掌吉士之選。今賢士大夫既不得出入禁闥，與
人主周旋講論，而聚數千百匪類，凶氣之人，笑然置
一天子於其中，又其人始已犯法造惡而入於刑，其
心術既不可用，而功名之路又窮於無所往，論其罪
則雖未至死而亦極於無可加，以無所往之人當無
可加之罪，以濟其不正之心術，雜襲善處而不盡惑

○抑○極○平○情○

○第○云○寫○得○真○危○悚○長○

○極○窮○人○

以爲非。豈人情哉。然則聖王在上。雖使奄宦於朝廷。有利無害。世固無復有可爲奄宦之人矣。吾故曰奄宦之當革。斷斷也。然女不可外。男不可內。嬪御至多。官中事至繁。此又不可以儒生常見擬也。革奄人則廢事而病法。法病而後復其害必甚於未革。吾則設爲所以革之之道。蓋爲之治其本。一在於官嬪之盛。一在天子罕接臣下。而必假奄人以出納其命。古者后妃嬪御有一定之數。與其職。今宜倣古而汰其餘。又常與臣下接見。早朝晏罷。或不時召見。便殿國家

大政皆得面相諮覆而中旨傳宣之事日寡如是則其本立矣。然今世所以不能無宦寺者不過以官中勞力之事無以給則請選女子羸健者若而人爲官婢以供力役備非常以左右倉卒傳宣之命無緣得達則請於內外間增設一所其男子則宿衛給事於外廷女子則給事於內宮內外之間例選民間寡嫗年五十以上六十以下端慎足使者充之令外廷之人有擅入中舍一步者斬官之人有擅出中舍一步者斬中舍之婦可使出至廷入至官出入所至之地

皆有限越限者則亦必斬昔唐昭宗悉誅宦官其出
監諸務者皆令方鎮殺之至莊宗卽位於是復求宦
者則此一二十年間其不用奄宦亦明矣然則奄宦
固未始不可革也

中舍選寡婦給事當有定數不可過多申明職掌
不得濫預他事但不可自官府竟取恐有中心不
肯就者官吏借法得以罔民或使婦人親屬代爲
自陳如國初票本例仍令其親屬遞甘結狀以防
奸欺有司親選觀其容止答應足稱端慎足使四

子而已。至於俸值當厚。人始樂就法。令當嚴。不許通問家信。及親人來往。犯者身斬家沒。人始畏法。其年過六十者。末出不用。此在行法時。所當斟酌周詳者也。乙酉自記

彭躬庵曰。儒生說到奄宦。開口便不免動氣憤激。此獨從仁字說來。源委極大。極正。更自動人。○古乳母。官婢。亂政者多矣。法可恃而不可恃。是篇根究情弊。思路曲盡。施行情審。以之治標。當無遺憾。丘邦士曰。○而法井井不差。是大文章。○維屏

按此不類乳母但似宮婢以較奄豎亦宮婢較勝
且宮婢亂政亦率少壯兼與奄豎表裏或得休沐
出入耳則此法又皆杜其端矣

門人吳正名曰宮婢宿衛久之未必無弊然近臣
下之時多選妃嬪之數少則端本澄源矣余師論
事無一可議如此

○○○變法下

古今之惡宦官以其惑主擅權爲害天下也而惡之甚者至于欲絕其種類而後已夫獨以惑主擅權爲宦官所宜去則曹節王甫之惡未必甚於蔡邕而李林甫盧杞之奸不下于輔國元振也宦官爲惡易于廷臣者特以其親近人主市寵售奸勢最便利耳今卽盡去宦官豈能使人主左右無供奉使令之人如其有之則所謂市寵售奸者昔在宦官今在此人矣爲此論之不特宦官之心有所不服其何以服人主

也。古之明君賢相，思其不可去，而患其爲妖，則立法以救之。曰：舉其秩少其數，不許讀書識字，交通外臣，言朝政是矣。然其類旣得見，則卑者可尊，少者可多，惟魯者可文，猾以至于得柄，何則？宦官之在朝廷，譬猶惡草之在田，根株不盡，則滋息蔓延，必連阡引陌，以害嘉禾者，勢也。昔太祖皇帝于宦官法制訓誡，盡美盡善。及成祖之身，而其法大壞。永樂元年，命內臣齊真提督廣東市舶。七年，遣鄭和領兵通西南夷。十三年，遣李達使西域。至十八年，而命內官主

東廠刺大小事情以聞矣十九年則繫尚書夏原吉
吳中等于內官監獄矣黃福鎮交趾馬瑊誣奏其有
異志黃儼江保等數譏皇太子于上詐傳上注意高
燧之言于外致孟賢變起幾危宗社嗚呼以成祖
之英明親爲高帝子而其法之壞已如此法尚可
特哉吾故謂聖王在上使罪人供事及令人自官以
進二者皆理法萬萬所不可以爲蹈于不仁之甚也
則是天下不應復有宦官之類蓋吾非獨惡天下之
已爲宦官者而實愛天下之將爲宦官者也洪熙初

上諭刑部曰自官以求用者惟圖一身富貴而絕其祖宗父母古人求忠臣于孝子彼父母且不顧豈有誠心事君今後有自官者必不貸蓋當洪熙初去洪武之法未遠宦官得志者亦未有王振劉瑾之遇顧自官以倖錄用者不可勝數至職官亦或不免上蓋心傷之求所以革其害者而未有得也而當時大臣卒無有廣主上之仁心以施于仁政者嘗讀史至光化同光之際未嘗不撫卷而太息以爲漢唐之季君子之欲除宦官者殺其身亂亡其國後世莫不以

爲戒而莊宗承唐梁驅除之餘親見其害而坐享其
利顧不思善爲之制而詔求于四方則何爲者且夫
莊宗當擾攘之時以強力取天下其君臣不過勢利
聲色之徒初無學術志識思以元后父母之道爲天
下君者苟且自便固無足責仁廟以英聖之姿守
祖宗之法天下治安朝廷清和此成康周召制禮作
樂之日也（重）（黃）（洪）（熙）（六）（臣）當時蹇夏三楊率皆起家經術爲國元老
言聽計從而不能改革制度永絕朝廷之禍本愛養
天下之赤子徒使聖謨數語虛載史冊失此萬世一

時之機會乎。可惜已。雖然，宦官所以得志，則又有其故，不可不知也。天子高居深宮，好察察爲明，大臣專務容悅以固位，苟祿欲求，所以當上意者而亡由故，不得不寄其耳目于內侍，出漏天子之言于已入揚已之譽于上，于是宦官勢日益重而馴致於不可制。然則宦官之害，始于大臣自輕，而後宦官重大，臣自賤而後宦官貴也。後世人主苟不能行吾說，第倣周禮奄人掌于太宰之制，使宰相得以制其死命，則亦庶乎得半之道矣。

按祖制不許用黔劓閹割之刑臣下敢有奏用此
刑者文武群臣卽時劾奏將犯人凌遲全家處死
夫有罪之人尚不許用閹刑而乃忍加于無罪之
赤子乎雖民間自閹原非上令而朝廷不革內官
甚或尊寵不思左右此輩千萬人從何來耶其勸
民之閹甚矣所謂驅而納諸罟獲陷阱也可見聖
主本有大不安之心革去之意特苦于無其代之
之法耳引君當道者不可以事大情重積習難變
而因循苟且不致主于堯舜也乙酉自記

彭躬庵曰革庵宦說到服其心愛養天下赤子古
今從未有人談及至推壞法之原得志之故三百
年盤互興區盡情抉剔如示掌中有玉者起必來取法
丘邦士曰上篇言立法其文如清廟明神拱挺異
列此篇言法中意其文如后土富媪保抱羣生絕
大文字○此事理甚明白世人反激成異論又因
而疑慮竟不敢措手矣此二篇只以公心正理言
之無一毫立異與人相激之意舅持論皆如此直
當許爲王佐之才

○○○封建一

或問于魏子曰周之封建不可行于後世柳宗元蘇軾論之備矣詩曰宗子惟城無俾城壞無獨斯畏王者易姓受命使庶孽子孫無尺土獨不已甚乎秦漢晉隋之事可見已唐宋聚族姓于京師幸其易制其後朱溫入洛金人陷汴京一朝而藏滅殆盡明興封諸王子于四方倣漢中葉之制世其爵不治其土故自護衛削而天下無強藩高煦宸濠之亂皆不旋踵夷滅及其變也子孫散處而亦無朱溫金人之禍子以

爲何如。魏子曰：是賢于漢唐宋矣。然自秦以來，其制蓋未有能盡善者也。周封建，仍夏商之舊，諸姬在天。下不及三十分之一。此論從秦末亡使周卽不封同姓，而後世強侯侵伐，天子衰弱之害，不可少減。又無晉鄭之屬爲之依輔。故周之封建，皆不可以公私論。自是而降，封國莫大于漢初，兵柄莫重于西晉，刻薄莫甚于魏，尊寵安富莫過于明。請言明制：藩王禮絕公卿，其支庶子孫皆爲王爲將軍，雖百世無或爲庶人者。然生長于深宮，老死于婦寺，不親政，不習兵，熙熙然食粟而高。

寢者方數百年。安不能以有爲。危不足自保。故獻賊
暴起西南。所至屠戮諸王宗室。不可勝數。而無能自
免者。絀于勢而不習于事也。國家一敗塗地。宗子拱
手奉頭。而不知所救。其失蓋在于不封建。曰周漢之
禍。明燕漢寧之變。不足慮。與魏子曰。吾非封建之如
周漢之君也。吾之封建。欲反周之制。而師其意。可使
國家無漢唐宋之害。而兼收其利。此其說莫善于顏
師古。唐貞觀中。太宗令群臣議封建。魏徵李百藥皆
執爲不可。師古獨曰。宜分王諸子。勿令過大。間以州

縣雜錯而居、互相維持爲置官僚皆省司選用法令
之外不得擅作成刑、一定此制萬世無虞、至哉古今
不易之論也、惜其制終格不行、師古亦未能曲暢其
說、而所謂置官僚者、則又有所未善、立政之篇曰、夷
微盧烝三亳阪尹、傳曰、尹、王官也、阪、險阻之地、不以
封、而天子之命吏治之、地制曰、王官所治、非一此特
舉其重者、今夫周之興也、封國蓋千八百國、慮天下
之土無不封建者、而王官所治猶多焉、此封建爲經
而緯以郡縣者也、反其道而用之、故莫若以郡縣爲

經而緯以封建。明幅員之廣，軼于漢唐。區天下而分之。凡爲京者二，爲省十有三，爲府一百五十有九，大小之州二百四十有四，爲縣一千一百七十有七。諸衛司之屬不與。誠以天子之子弟差次，以王公之封。王之畧百有五十里，公之畧百里，使世有其土而制其政令，以參錯于郡縣之間。且夫天下至大，天子之子弟至少也。度其人之封地，不足以當王朝十一。而又倣周阪尹之制，都會之處險阻，負隅之地鹽鐵金錫山海之利，不以封諸凡封建之邑，則皆夾之以大。

郡縣有屬注天崩何建海之機當是時雖有吳楚淮南不肖之子弟而亂無所
于作。至于天下多事。京師有大故。則子孫之賢者可
以投袂而起。而郡縣將吏草澤之忠臣義士得相與
扶持。藉其名實。以奮發于下。諸侯王習吏事久。旬練
于世故。知其所以成敗。不至如飽食安寢者之驕蹇。
額蒙而一無所識。其椎魯無用之人。則又散處于四
方。而不虞乎聚族而殲之變。吾故曰。可使國家無漢
唐宋之害。而兼收其利者。此也。然使官僚皆選用于
朝廷。則藩王終不得有爲于國。而積漸之久。必至如

蕭齊典。蠶之禍。吾則以爲封國旣小。力不足以作亂。天子但爲置師傅一人。以公卿之老成有德量者充之。其長史以下。則廢置生殺。王得專之。而報于天子。或曰。天子之子弟。是則然矣。聖人以天下爲公。其不得已而家天下者。非徒欲富貴其子孫。亦以子孫蒙業而安。則天下之禍亂不作。而民生休息也。然乃使致死戮力。與我共定天下之人。終身無尺土之奉。吾子孫之無功德而蒙先業者。富有四海。世世爲帝王。不絕。此不獨無以服功臣之心。其何以謝天下曰。封

建之不當復雖聖人不易也而國家必不能不封宗
子封宗子則不得不善其法若夫異姓諸侯之亂其
絕于天下久矣而興之可乎明與報功臣以公侯伯
三等之封有爵而無土嫡長世襲支子或入武學或
立軍功其才能者或使掌五府之事出平寇賊坐鎮
邊隅非大逆無道罕至誅削者可謂善矣然生不封
王裔子食祿閒居而任職者少非制之盡善也吾則
以爲開國功臣當差次以王公侯伯子五等之封高
其第宅厚其田祿賜予使其子孫世世爲王侯與國

家之支庶等而其賢才者晉以將相卿貳之任不限以文武之途則不至于參養無爲而繼世之後文臣要吏亦不敢侮蔑陵踐之如昭代承平之弊如是而功臣之心可以無憾矣夫唐之藩鎮封建之未成者也當其未造國家未至于覆亡禍已不可勝言而況封建也哉

弟和公曰本思古之論發爲雄文大小本末無不兼該折衷千古之紛紜立百世帝王之大法此文出而子厚東坡之論皆燭火矣茅鹿門稱子厚爲

千古絕作惜其不見此耳○文分三大段前段言
封建不可廢中段暢師古之論而補其未備末段
言異姓之不當封土各極透暢

○○○封建二

平居無土地人民政事而欲望其扶危定傾于喪亂○第○云○此○孔○子○所○以○不○王○而○重○子○之○諸○二○聖○人○必○日○得○
之日雖湯文之聖難以崛起少康之賢難以中興何○百○里○之○地○能○成○難○有○不○音○人○土○而○興○者○自○是○故○據○
則其才無所布德澤無所施下無以懷其民而四方
無所望也故曰封建必世其土而制其政令世之平
也郡國相安無事及其變郡縣將吏必能擇其近國
宗子之賢者而戴之宗國同時並起以誅逆亂不待
詔令而文天祥藩鎮之勢已成吾嘗觀國家敗亡之
際忠臣義士代不乏人然倉卒定策不能揆知其賢

不肖漢○呂○邑○不○所○以○一旦戴之爲君其後過惡顯著或庸懦無所知識雖心悔之不可得易而祖宗大業亦遂因以淪胥亦○之○事○難○解○見○然○命○亦○向○也○失○未○可○復○也○夫使蒞政治民威德加于百姓賢聲聞于天下則宗國中苟有一人足爲少康者天下州郡莫不願爲虞仍故曰必世其土而制其政令者此也然明制之失則又非特不有土治民而已請詳言之明制諸王之子嫡長襲爵而親王支子爲郡王郡王支子爲鎮國將軍鎮國子爲輔國輔國子爲奉國皆將軍奉國將軍之子爲鎮國中尉鎮國子爲輔國輔國子爲奉國

中尉自親王至奉國中尉凡八世。拜爵而奉國中尉以下世世拜中尉。傳于無窮。冠帶食祿不與四民之業。又凡嫁娶喪葬生子命名必聞于朝廷。朝廷賜之財費皆厚贍。夫高皇帝之爲是制也。以爲遠至數十世皆吾聖子神孫。屬毛離裏之人。當時無他族。唯靖江王守謙一人而已。後雖皇子浸多。除趙王已少。子南之殤。其長者二十五人耳。他日雖倍而百之。其數可知也。及神廟十二年。宗正上屬籍者已十六萬。烈廟之末。蓋幾百萬人。極天下之財賦不

足贍宗室之祿而朝臣貪肆無狀敢于凌蔑聖祖
之子孫諸凡乞請非賄賂不行于是有年長大而無
名男女壯且老不得嫁娶者諸宗既奢侈成習祿或
不給又不得業四民以贍其身于是放僻邪侈苟且
于衣食者至君子所不忍道嗚呼高皇愛其子孫
爲甚厚之制亦豈知其敝之至于此夫以公天下之
心愛子孫則子孫利而天下亦利以私子孫之心治
天下則天下害而子孫亦害故其法不可以不變變
之何如王世貞曰君子之澤五世而斬是已今夫古

之族非如今所謂同姓也。上自高曾祖考至于身凡五世服盡矣。下自身而子孫曾玄凡五世服盡矣。故雖曰九族而實不過五世。請言其法。凡開國天子之

子爲王。繼體之天子子爲公。

漢明帝曰我子豈得與先帝子比開創功大繼

體蒙業故封子有差

凡始封之王至五世其嫡長世世襲王爵。

支子爲卿。卿之嫡爲大夫。支子爲郎。大夫之嫡爲郎。

支子爲士。郎之嫡爲士。支子爲庶人。生而爵祿者自

王至于士而止。士之子嫡庶皆爲庶人。不通籍于天

子而譜系其國。謂之庶宗。凡繼體之王自六世以下

嫡子亦世世爲王而支子爲大夫

不敢疑天子之懿親亦五世之義

大夫以下無降

爵祿薄不得更降此列國卿祿有異而大夫以下從同之義○始封之公

五世嫡長襲公

支子爲大夫繼體之公自六世以下嫡子亦世世襲公支子爲郎餘准此凡爵命

于朝廷祿賦于其國自卿大夫郎士皆祿而不官官

于國者必以賢

子孫衆則卿大夫郎士多其人未必皆賢而王國官屬又少此所以草世

卿之弊廣用人之途也

自卿至于士王皆得以其賢者升于朝

天子試而用之因其才不從其品秩凡庶宗分執四

民之業而特免其徭有故徙他郡國爲浮客者王皆

給以牒使質于有司復其家凡生子命名婚嫁喪葬

自王卿大夫皆聞于天子。天子賜以財。郎士則聞于

王。而王賜之。其賜皆有制。凡王國必建學。庶宗爲士

者。謂業儒者非郎士之士。視其國人之士。王試而錄之。爲生員。

亦三年一試。入于王學。三年試而錄之。牒送于其省。中式

者。試禮部爲進士。皆不限其有無之數。國有奇材異

能。堪將相方面大吏者。則王特薦之。郡縣之士可仕

于王國。王國之士。兼庶宗國人而言。可試於郡縣。此如周列國之制。有

分土無分民之義也。但他試他仕者。須有司及所錄

國王給牒爲驗。以防娼優隸卒罪人諸奸弊。生員三年之試。仍照歲科

生員科舉。其名數皆有制。並行例。舉增降黜如舊法。

王官屬師傅而下長史一人總一國之政任比天子之宰相秩視三品之卿吏戶禮兵刑工六曹各一人任比天子六部尚書秩視四品之大夫學政則攝于禮曹軍政則以兵曹爲帥

以武臣爲之如宋之太尉

其儀衛饗樂

諸小吏皆分統于六曹制其員數自長史六曹王選之而報于天子小吏不以聞

凡生殺廢置準此

王尊師傅而

不名非大朝賀則師不拜拜則王答之如賓禮凡王五年一朝師從世子長史監其國三年王命長史及宗卿一人

無卿則以大夫

上治行于天子貢其方物有定制

王非朝不得出境內。此其大畧也。爵公者帥是制有
差。凡軍王八百人。公五百人。郡縣有警。列國各守其
境內。非調發。雖追盜不得踰封。明王國有調發例凡封國非
謀叛大逆。兵入郡縣境。殺天子命吏者。不絕其國。貪
暴淫穢不道者。執而囚之。京師擇賢而立之。國不治
者。謫讓其長史。六曹大則易置其吏。而朝廷三年一
命大吏。巡察其境。卽以巡方行之。不必特命。如此則朝廷尊。藩王
順。善足以治。惡不足以亂。無事爲天子宣布德化。則
收漢唐宋郡縣之利。有變藉以扶持興復。則得周封

建之益。豈惟子孫世世安于泰山。雖使天下萬年有道可也。

弟和公曰。文分三大段。首段暢前篇未盡之旨。而以有封國爲易于擇賢爲從來右封建者所未道。次段論舊制之敝。原委洞達。末段詳封國之法。大綱旣舉。萬目亦張。真三代以後未有之制也。而其文明切簡練古法森然。

〇〇封建三

或曰子之法善矣。天下有變。郡縣各奉宗國。則亂賊
既平。同姓必相攻而不已。此晉八王之禍也。魏子曰。
不然。晉八王無事而亂。天下吾之法。天下既失而群。
起以興宗國。宗國群起而猶有一人焉得之。則吾祖
宗之子若孫也。且子獨不見往事乎。秦之亡也。陳氏
一呼而天下崩裂。先後建國者二十有七。西漢末。僭
國十有一。東漢末。僭國六。晉之亂。僭國十有六。隋亡。
僭國十有五。唐之衰。爲藩鎮者二十有二。爲亂賊者

六五代之際。僭國十有二。宋僭國一。亂賊九。元末僭國七。自秦至元。非帝王而僭號與竊據一於者凡一百四十有二家。而北之魏齊周宋之遼金不與焉。當是時。惟西漢劉末。東漢劉焉。劉表。北漢劉崇。四人者。爲宗室其餘一百三十有八家。則皆庶姓非國家所建置者也。豈必同姓而後爭哉。且從來國家喪敗之際。群雄並起。多竊故主名號。呼召天下。故秦之亡。陳勝詐稱扶蘇。而項氏立楚懷王。王莽篡位。卜者王郎詐稱成帝子。盧芳詐稱武帝曾孫。至元末而韓林兒。

猶稱宋號。其他忠臣義士。或親奉宗子。或遙假名號。以興義師者。不可勝數。嗚呼。士大夫不幸而當其時。非甚狂悖喪心。未有不痛宗國之淪。凶而奉異姓。以滅其宗子者。吾故曰。吾之法。無漢唐宋之害。而兼收其利益。百世以俟聖人而不惑者也。

弟和公曰。此篇分二段。前段明庶姓必爭。不必同姓。後段言亡國之時。奉故姓者多。皆極根株的確。○此篇只作第二篇餘波。而文似漢書論贊。

議引

議者策之餘也其說不必盡關天下之事故別錄之

魏禧自識